

Dia 21 di mei 2008; Prome lustro di Papiamento como idioma oficial na Aruba

PA motibo di respet y gran pasion y amor pa mi idioma Papiamento mi kier denuncia awe 21 di mei 2008, dia di e prome lustro di Papiamento como idioma oficial, e masacre cu ta tuma lugar aki na Aruba cu idioma Papiamento.

Mi a bira den tur bocht, aserca mas cu 30 persona cu conocimiento di e materia, cu ta na altura di cierto eror y faltanan, trata di yega na un solucion na un forma discreto sin ningun resultado. Ningun hende no kier kima nan dede, ni nan pan.

Ta di lamenta cu nos ta actua manera bombanan moderno cu ta mantene esnan cu mente corumpi den nan posicion di shon omnipotente.

Den Exposicion Herencia di Sclabitud tin falta di respet flagrante pa cu Papiamento, consecuentemente esaki ta encera falta di respet pa nos herencia di slavitud tambe.

Dia 20 di februari n’e apertura oficial, mi a mira mi wela sunu ora cu n’e seccion di cushina,

mi a mira un lele, cu a cambia number bira pal’i funchi. Hopi hende a mira e vupa aki, pero nan a opta pa keda keto.

Herencia di sclabitud bibo bibo. T’esaki e colonisado a siña nos. Menosprecia loke ta di nos. Ta nan sa! Ta nan ta dicta y dicidi asta riba nos bida. Nos mester keda keto y acepta. Durante di e fenomenal simposio na Biblioteca Nacional, mi a puntra kico a haci cu observacion, comentario, sugerencia, critica y erornan cu a señala. Contesta tabata. Nos no a cambia nada.

Esta un farsa, malinformacion na nos pueblo, hoben y bishitantenan, trosemento di nos historia, un violacion di nos idioma!

Menosprecio pa nos cultura, blasfemia pa artefactonan sagrado cu a pasa den man di catibonan. Infraccion cardinal di e resto di un exposicion excepcional cu a pasa Hulanda, Corsow y Surinam.

Esaki ta hustamente e crimen di slavitud cu nos ta tene na

bida bao di e capa cu nos ta conscientisa.

ARUBA, ainda nos ta tolera mitar berdad, of pio ainda trosemento di e berdad? Ainda nos ta acepta cu un experto ta bin bisa nos cu un WIRI ta un RASPA? Y cu nos lele ta un OBHETO NO IDENTIFICA?, pasobra mientrastanto a kita e number di pal’i funchi for di e lele, lage sin number.

Mi ta compronde cu no ta tur hende y no ta tur experto conoce e agan cu nan a pone su number, banda di e instrumento matrimonial.

Barita cu nan a yama hero. Gogorobi cu nan a yama fluit.

Ami sigur no ta experto, sinembargo mi conoce nan, pasobra mi a lanta den e ambiente caminda cu tabata traha nan y tocanan. Mi a coba busca den mi historia pa mi a siña mas especialmente di e pagina scur di sclabitud riba nos islanan. Fuera di esey tur investigado sa bon-bon cu nos mester duna balor na nos grandinan y cuminsa informa serca nan.

Mi ta convenci cu tur hende di mi edad sa, cu kurk ta corki. Zadel ta siya y kom ta comchi. Dakue, Macuto di saco, yugo, pilon cu manga, gobi, les, lapiston, sokete, werchi, rendu, stripan, tutumba, tapara, saya cu djeki, stelchi, campana, ta djis algun di e scala di obhetonan no identifica.

Papiamento ta subestima y pisotea.

T’esnan cu tin Papiamento na pecho so, por sinti esaki. Aña 2008, Aña dedica na Cultura na Aruba. Aña 2008, Aña Internacional di Idioma proclama pa Unesco.

Unesco ta invita Gobierno, organisacion, institucionnan educacional y tur otro actor den e area aki, henter pueblo pa con humilde cu e por ta pa intensifica nan propio actividadnan p’asina por haya respet, promocion, y proteccion, pa tur idioma.

No ta importa ken bini cu e iniciativa. Laga e iniciativa promove e idioma como herment pa integracion social of pa explora e relacion entre idioma

y economia.

Ta pesey mi suplica ta pa tur hende bishita e Exposicion Herencia di Sclabitud, cu riba su mes ta un iniciativa excelente cu hopi hende y instancia a hinca tur nan amor y dedicacion aden y awor ta brinda nos un oprtunidad pa contribui cu loke nos sa.

Laga nos tur duna oido na Koichiro, Matsuura, Director General di Unesco su yamada y acudi n’e exposicion cu nos pen y papel y laga e number nan corecto na Papiamento na cada obheto no identifica of cada sinonimo cu nos tin di un obheto.

Awe mi kier contribui cu e prome lustro di Papiamento como idioma oficial na Aruba, no cu palabranan di felicitacion fofo, pero den forma di e protesta aki.

Por manda un mail pa fundacion.ehsa@gmail.com y demanda respet pa Papiamento. Munye Oduber Winklaar, tel. 583-2956. oduberwinklaar@yahoo.com